

A1 A.1

1. Sara Rauch, magistra

Che es Seis manster e che lavurs cumpiglia quel principalmaing?

Resposta: Eu sun üna persuna d'instrucziun ed instruisch tuot ils roms, saja quai matematica, inglais, nodar o eir etica. Eu prepar lecziuns variadas e lavur ed imprend insembel cun uffants ill'età da 10 ons.

Perche ha Ella tschernü quel manster? Che Tilla plascha specialmaing bain vi da Sia lavur?

Resposta: A mai plascha da lavurar insembel cun uffants. Il minchadi in nos manster es fich varià ed i fa plaschair, schi's po accompagnar ad ün uffant sur plüs ons e verer il svilup ch'el fa d'ürant quist temp. No imprendain in stanza da scola ma eir our il liber e quai am plascha fich bain.

Che sun la(s) sfida(s) in Seis manster?

Resposta: Üna sfida es la gronda diversità chi dà in üna classe, saja quai a regard la lingua o eir il nivel ed il stadi d'imprender. Da preparar ün'instrucziun chi suoglia tuot ils bsögns douvra bler temp, impustüt schi's instruischa pür daspö pacs ons. Ün'otra sfida es l'organisaziun da tuot quai chi capita sper l'instrucziun regulara.

Po El/Ella quintar d'ün mumaint special in Seis manster?

Resposta: L'on da scola cun mia prüma classe es stat ün di chi'm restarà in bun'algordanza. Eir sch'eu n'ha instrui a quella classe be ün on, vain la classe ed eu pudü fabrichar sü üna fich buna relaziun. Ils uffants ed eu vain passantà blers mumaints specials e tanter oter vaina guadagnà ün premi per ün filmin cha no vain fat d'ürant ün'eivna da proget. Sco premi/regal vaina das-chü ir ün di giò Turich a verer nos film i'l Blue Cinema.

2. Oscar Walther, impiegà da banca

Che es Seis manster e che lavurs cumpiglia quel principalmaing?

Resposta: Eu sun consulent per cliantella benestanta i'l sector dal private banking pro üna banca regiunala. Ün punct central es d'esser il partenari da contact per tuot las dumondas chi han da chefar cun plizzer munaida, investizuns in aczias, obligaziuns, fonds e.u.i sco eir planisaziuns da pensiun.

Perche ha El tschernü quel manster? Che Til plascha specialmaing bain vi da Sia lavur?

Resposta: L'interess vi da l'economia, la buorsa e'ls differents girs da la munaida m'han adüna fascinà. Mincha cliaint es unic e mincha giavüsch, situaziun es diversa. Implü am plascha specialmaing il contact direct culla cliantella. Bain am plascha eir da pudair discuorrer vallader e da pudair far quist manster in nossa regiun.

Che sun la(s) sfida(s) in Seis manster?

Resposta: Ün da las sfidas principalas es per mai d'incleger il plü bain pussibel al cliaint cun seis giavüschs ed intents. Quai funcziuna tenor mai be scha la fiduzcha es avantman. Ün'otra sfida es sgür tuot il gir da la buorsa chi'd es colliada strettamaing cul gir dal muond.

Po El quintar d'ün mumaint special in Seis manster?

Resposta: Id da per furtüna blers mumaints specials in meis manster. La plü bell'experienza per mai es adüna darcheu ün sincer grazcha fich dal cliaint. Tuottafat special in meis manster es eir da pudair til cusgliar ed accompagnar sün sia via economica e da crescer uschè insembel.

3. Mazzina Noggler, specialista da sandà

Che es Seis manster e che lavurs cumpiglia quel principalmaing?

Resposta: Eu n'ha fat il giarsunadi d'impiegada specialisada da sandà (FaGe) e n'ha fat davo la scolaziun da specialista da sandà diplomada (diplomierte Pflegefachfrau). Las lavurs sun fich vastas e variadas. Mias lavurs principalas sun chürar e fliar glied cun mendas da sandà.

Perche ha Ella tschernü quist manster? Che Tilla plascha specialmaing bain vi da Sia lavur?

Resposta: Eu n'ha tschernü quist manster causa cha'l contact culla glied e la lavur sco tala am plaschan fich bain e causa ch'eu m'interess per la medicina e l'anatomia umana. Implü survegn eu blera recugnuschentscha per mia lavur. A mai plascha zuond bain l'accompagnamaint individual dals paziants e da las paziintas. La lavur tecnica medicinala m'interessa e'm fascinescha fich.

Che sun la(s) sfida(s) in Seis manster?

Resposta: Üna gronda sfida es il squitsch da temp. La lavur dumonda gronda flexibilità ed ün spiert alert. Il manster maina eir cun sai üna gronda respunsabilità. Situaziuns difficilas pretendan chi's resta equilibrà e chi nu's lascha gnir persunalmaing massa dastrusch, scha alch nu va sco chi's vess spettà.

Po Ella quintar d'ün mumaint special in Seis manster?

Resposta: Ün unic mumaint special nu'm vain güsta adimaint. A mai fascinescha, sch'üna persuna es buna, adonta da seis malessers, da muossar recugnuschentscha e respet invers mia persuna e mia lavur. Quai am motivescha da m'ingaschar amo daplü. Quai n'haja pudü retschaiver plüssas jadas.

4. Andri Cuonz, guardgia dal Parc naziunal

Che es Seis manster e che lavurs cumpiglia quel principalmaing?

Resposta: Eu sun guardgia dal Parc Naziunal Svizzer. Meis manster cumpiglia principalmaing la survaglianza dal parc, il mantegnimaint da sendas ed infrastructures, il contact cun visitadurs, la collavuraziun in progets scientifics, dombraziuns e marcaziuns da vuolps e sulvaschina d'ungla sfessa. Implü maina ün chan da sang. Tuot quai chi'd es our il liber.

Perche ha El tschernü quel manster? Che Til plascha specialmaing bain vi da Sia lavur?

Resposta: La lavur es our illa natüra e na sün üna sopcha da büro. Observar sulvaschina, dombrar e marcar bes-chas sulvadias am plascha specialmaing bain.

Che sun la(s) sfida(s) in Seis manster?

Resposta: Da pudair lavurar our illa natüra ed aint il unic parc naziunal svizzer. E d'avair conrespunsabilità per quist toc natüra protetta.

Po El quintar d'ün mumaint special in Seis manster?

Resposta: Ün mumaint special es stat d'avair pudü observar il luf tscharver.

5. Anna Mathis Nesa, indschegnara forestala

Che es Seis manster e che lavurs cumpiglia quel principalmaing?

Resposta: Meis manster es indschegnara forestala e mias lavurs sun fich multifarias. Eu n'ha svest ü'n büro chi fa lavurs forestalas, no fain lavurs da planisaziun o eir masüraziuns champestras. Implü suna magistra pels giarsuns bos-chers e lavur parzialmaing i'l Parc Naziunal Svizzer. Il minz da mia lavur es però adüna il god e la natüra.

Perche ha Ella tschernü quel manster? Che Tilla plascha specialmaing bain vi da Sia lavur?

Resposta: Eu n'ha tschernü quist manster, perquai cha a mai fascinescha la natüra cun tuot sias fatschettas. Il god es ün misteri ed ün important spazi da vita per bleras plantas e bes-chas, e da til pudair ütilisar, fuormar o eir proteger es bain üna stupenda lezcha?

Che sun la(s) sfida(s) in Seis manster?

Resposta: Üna sfida es sgüra il temp – nos muond viva svelt, i dà di per di müdamaints, il god invezza crescha in otras dimensiuns, in tschientiners. Scha nus intervgnin hoz i'l god, nu's vezza pel solit las consequenzas. Sco silvicultur o silvicultura as stoja esser bun da pensar a lunga vista, e quai nun es adüna simpel.

Po El/Ella quintar d'ün mumaint special in Seis manster?

Resposta: Eir scha quai nun es la lavur d'ün'indschegnara forestala, schi n'haja fat il cuors per schmerdscher bos-cha. Cur ch'eu n'ha schmers meis prüm bös-chun es stat ün mumaint special – che forza, che fracasch e cur cha'l bös-ch es per terra la quietezza, la nouva clerità e la savur da lain e rascha ... Uschè ün bel lö da lavur nun ha ingün oter!

6. Valentin Hohenegger, falegnam

Che es Seis manster e che lavurs cumpiglia quel principalmaing?

Resposta: Eu n'ha imprais avant 36 ons il manster da falegnam cul diplom da falegnam da mobiglia. Mia lavur cumpiglia però eir da far offertas, tour masüras e far ils disegns per la producziun da la mobiglia.

Perche ha El tschernü quist manster? Che Til plascha specialmaing bain vi da Sia lavur?

Resposta: Eu n'ha tschernü il manster da falegnam in prüma lingia causa cha meis genituors vaivan svest üna falegnamaria. I faiva grond plaschair dad ir minchatant sco uffant cun ün falegnam a portar oura e montar mobiglia. Il lavurar cun lain ed impustüt cul dschember am plaschaiva specialmaing bain, eir causa l'agreabla savur dal lain.

Che sun la(s) sfida(s) in Seis manster?

Resposta: La cugnuschentscha da blers lains, da plattas ed eir dad oters materials, tscherner la dretta fierramainta per differentas construcziuns, savair lavurar cun tuot las maschinas in officina ed eir fabrichar mobiglia e lavurs internas. Quai sun grondas sfidas in meis manster.

Po El quintar d'ün mumaint special in Seis manster?

Resposta: Ün mumaint special in meis manster es stat dal 2013, cur ch'eu n'ha pudü surtour l'affar sulet da meis frars. Ün mumaint special in meis manster es eir stat dal 2017, cur cha nus vain pudü far üna lavur fich specia e pretensiusa a Zermatt, intermediada tras ün architect da Turich.

7. Fadrina Hofmann, schurnalista

Che es Seis manster e che lavurs cumpiglia quel principalmaing?

Resposta: Eu sun schurnalista e scriv artichels, commentars e recensius pella Engadiner Post/Posta Ladina.

Perche ha Ella tschernü quist manster? Che Tilla plascha specialmaing bain vi da Sia lavur?

Resposta: Sriver es mia paschiun ed eu n'ha jent istorgias interessantas da tuot gener. Eu am vez sco üna sort collecziunadra d'istorgias.

Che sun la(s) sfida(s) in Seis manster?

Resposta: I nun es adüna simpel da restar neutrala in quist manster. Pro tscherts temas n'haja ün'opiniun clera, e listess n'haja da resguardar adüna tuot las differentas varts. Important esa da restar correcta e lavurar in möd serius.

Po Ella quintar d'ün mumaint special in Seis manster?

Resposta: In meis manster n'haja adüna darcheu mumaints specials. Eu n'ha pudü ir per exaimpel cul bob tras il Cresta Run a San Murezzan, n'ha pudü tadlar l'istorgia da vita d'üna duonna da 100 ons, perscrutar ün bunker zoppà e far ün'intervista culla sour da Barak Obama.

8. Duri à Porta, turistiker

Che es Seis manster e che lavurs cumpiglia quel principalmaing?

Resposta: Eu lavur sco mainaproget in ün grond büro da viadis. Mia lavur cumpiglia dad organisar e realisar viadis da gruppa in ün gener plütost exclusiv. Ils viadis dūran tanter üna fin plüssas eivnas e tuots cuntegnan visitas o inscunters specials.

Perche ha El tschernü quel manster? Che Til plascha specialmaing bain vi da Sia lavur?

Resposta: Eu poss crear viadis specials per giasts ed accumplir lur giavüschs. Usche possa s-chaffir aventüras unicas e bellas regordanzas cun mias ideas e mia experienza. Implü am fascinescha il muond, ed eu sun fich interessà da'm confruntar cun novs pajais o novas culturas.

Che sun la(s) sfida(s) in Seis manster?

Resposta: Da collavurar cun fich blers differentes partenaris da tuot il muond. Eir las differentas culturas sun adüna darcheu üna sfida.

Po El quintar d'ün mumaint special in Seis manster?

Resposta: Scha davo ün viadi tschüffa per e-mail obain per posta ün resun positiv dals giasts ed i sun inchantats da lur viadi. Quai es per mai adüna ün fich bel mumaint.

9. Riet Caflisch, paur

Che es Seis manster e che lavurs cumpiglia quel principalmaing?

Resposta: Eu fetsch da paur. Las lavurs principalas sun d'inviern impustüt muldscher las vachas e pavar las bes-chas. Insomma lavurs in stalla. Da stà es la lavur principala far aint il fain ed il rasdiv.

Perche ha El tshernü quel manster? Che Til plascha specialmaing bain vi da Sia lavur?

Resposta: Fingia meis bazegner e meis bap d'eiran paur. Uschè ch'eu sun creschü sü sülla pauraria. Eu laiva gnir fingia da pitschen sü paur. Il plü interessant fa gnir quist manster cha la lavur müda mincha di. Eu lavur eir fich jent cun bes-chas. Perquai d'eira quist manster predestinà per mai.

Che sun la(s) sfida(s) in Seis manster?

Resposta: Las sfidas sun sgür cha per far da paur hozindi as esa bler in büro. Eir las ledschas chantunalas e federalas as manifestan adüna daplü illa pauraria. Uschè nun es il paur plü propa independent.

Po El quintar d'ün mumaint special in Seis manster?

Resposta: Mumaints specials daja sco paur garanti blets. Per exaimpel es mincha naschentscha d'ün vadè alch fich special. Ün dals mumaints ils plü specials e blets es sainza dubi il di cha las vachas pon ir ad alp. Quai es minch'on ün evenimaint fich special.